

# Kementerian Tenaga dan Sumber Asli diminta kecualikan pas pengalihan

**K!** [kosmo.com.my/2022/09/16/kementerian-tenaga-dan-sumber-asli-diminta-kecualikan-pas-pengalihan](https://kosmo.com.my/2022/09/16/kementerian-tenaga-dan-sumber-asli-diminta-kecualikan-pas-pengalihan)



JASIN – Kementerian Tenaga dan Sumber Asli (KeTSA) diminta mengecualikan pas pengalihan kepada pemilik tanah persendirian bagi memudahkan urusan pengambilan kayu-kayan yang terdapat di hartanah tersebut.

Menteri Perusahaan, Perladangan dan Komoditi, Datuk Zuraida Kamaruddin berkata, dalam komuniti perladangan terdapat polisi kerajaan di bawah KeTSA yang menyatakan bahawa pokok yang hendak ditebang di tanah persendirian perlu mendapat kebenaran terlebih dahulu.

Menurut beliau, prosedur itu dianggap sebagai birokrasi yang tidak perlu terutamanya jika melibatkan tanah persendirian.

Ads by Kiosked

“Terpulang kepada pemilik tanah persendirian sama ada dia hendak mengeluarkan pokok-pokok atau membersihkan tanah untuk buat rumah, pada masa sama kita boleh ambil sumber kayu-kayan yang ada di sana.

“Jadi mengapa perlu permohonan untuk mendapatkan kelulusan pengeluaran, saya mohon KeTSA kecualikan polisi ini,” katanya.

Beliau berkata demikian pada sidang akhbar Majlis Penanaman Pokok Sempena Hari Kemerdekaan dan Hari Malaysia 2022 di sini, hari ini.

Mengulas lanjut, Zuraida memberitahu, beliau ada menerima keluhan daripada pemain-pemain industri yang sukar mendapatkan bahan-bahan kayu.

“Kayu-kayan banyak didapati di kawasan kampung, namun mereka dikekang dengan polisi berkenaan,” katanya.

Sementara itu, mengenai perkongsian teknologi dalam bidang perkayuan, Zuraida mahu Malaysia segera mengambil peluang untuk menjalin kerjasama dengan negara sedang membangun atau dunia ketiga.

Ads by Kiosked

“Malaysia memiliki kepakaran menerusi penyelidikan yang berterusan sejak 50 atau 60 tahun lalu, contohnya Institut Penyelidikan Perhutanan Malaysia (FRIM) memiliki jabatan penyelidikan dan makmal ujian yang boleh dibawa ke sana.

“Perkongsian ini akan memberi manfaat kepada negara-negara lain untuk belajar dengan pantas. Antara negara yang berpotensi seperti Bangladesh, Pakistan, Kemboja serta India,” ujarnya. – KOSMO! ONLINE